

«Ок, мыйта, мыйта сьёкыдсё пыкин да венін...»

Менам баб, Ульнырова Елизавета Ивановна, чужис сюрс өкмыссё кызь көкъямысод вося моз төлысь дасод лунө Кулөмдін районса Руч сиктын. Быдмис крестьянин семьяын. Екатерина Степановна мамыс да Иван Фёдорович батыс уджалісны колхозын. Бать-мамыслөн вөлі квайт челядь, Лиза – медся ичотыс. Видзисны квайт мөскөс да уна куканьёс, пуктылісны уна турун.

Бабөй велөдчис сизимөд классын, кор пансис война. Унатор быдмигчөж висьтавліс меным сійө сьёкыд кад йывсьыс. Дас кык арөссянь ковмис вунөдны аканьяс йылысь да кадысь водз верстяммыны, мед гырысьяскөд өтвылысь матыстны ыджыд Победа лун.

Бабөй казтылө, война пуксян лунө пö Ручын вөлі сөмын өти телепон. Лёк юөр воис Кулөмдінысь лөддза-номъя кызь кыкөд лунө өкмыс час асылын, кор ставныс нин вөліны удж вылынөсь. Колхозса председатель ыстіс сиктса челядьёс чукөртны став йөзсө сельсөвет керка дорө. Сөмын дас кык час лунын Руч сикт төдмаліс, мый сувтіс война.

Пыр жö сюрисны война вылө мунны окотитысьяс. Найө нөшта на и шмонитісны: «Та ылнасянь пока мунам, войнаыс помасяс нин!»

Мөд асывсянь мужичөйяс кутісны мунавны фронт вылө. Кодөскө нуисны машинаөн, мукөдсө – паракодөн, а төвнас – доддьын.

Некор менам оз вун бабөлөн война пуксян кад йылысь висьтъясыс. Некымын вежон сиктын кыліс мамъяслөн, гөтыръяслөн да челядьлөн бөрдөм, кор найө пьянсө, верөсьяссө да батыяссө колльөдісны ылі туйө.

Ёльдорса Дөрөпей Изосимөс босьтісны фронт вылө война медводдза луньясө. Маков Иван Еле гөтырыс коли вит челядьөн. Көть и бабөй вөлі ичөт, некор оз вунөд сійө лунсө. Изосимөс колльөдны чукөртчис став сиктыс. Еле бөрдө, горзö: «Кызди нө ме вит челядьнас? Кулам өд ставөн!». Туй вылас водөмөн мусö гыжъяліс. Изосим война вылысь бөрсө эз и лок. Медся ичөт пиыс, Валерьяныс, куліс. Коймөд классын вөлі велөдчө.

Война вылө босьтісны и бабөлысь кыкнан воксө. Комын өти арөса Ёгор вокыс локтіс бөр синмас ранитчөмөн. А кызь өкмыс арөса Мишө чуньястөг.

Регыд сиктын эз кольны том дзоньвидза мужичөйяс. Став сьёкыд уджыс вичмис челядьлы да нывбабаяслы.

Война дырйи бабөй уджаліс «1 мая» нима Кустпромын вурсьысьөн. Колө вөлі вөчны план. «Ставсө фронтлы, ставсө Победа вөсна!». Быд лун ыстісны фронтлы пасьяс, гын сапөгьяс, кепысьяс. Планыс вөлі ыджыд, уджалісны шойччитөг. Бабөй казтылө: «Ми, войнадырся челядь, ёна мудзлім да

тшыгъявлім. Уджыс вöлі уна, а сёяныс – этша. Посни челядь ёна и кувласисны, сöмын кын картофелён он пöт. Сёям вöлі кач: лиалам пу вожлысь небыд пытшкөссö, вöчалам шаньга да пöжалам. Качыс эз вöv чöскыд, зэв чорыд, но куш кынöмнад öд он ов! Кушнас кө сёян, висьмö кынöмыд. Кодъяс вöліны ичöтджыкöсь, ёна-й мырсьылісны кынöм висьöмөн. Миян мöскыд вöлі, да сійö дорйис тшыг кулöмысь».

Медся сьöкыд вöлі налы, кодъяс тöдісны немеч кыв. Сиктын оліс Юлия нима нывбаба. Ручса Педөр Семен гражданскöй война дырйи овлöма пленын Германияын да батракавлöма немеч котырлы. Тöдмасыс налөн Юлия нывкөд да ваяс сійöс Ручö гöтырөн. Великой Отечественной война дырйи Семенöс босьтасны, Юлия кольö Ручö нель челядьöн. Недыр мысти кыкнан писö тшöтш нуасны фронт вылö. А сэсся Юлияöс Петя да Елена челядьыскöд ыстасны Лопыдинö лагерö, сы вöсна мый Юлия вöлі немкаөн. Ручысь лагерö ыстісны и немеч кыв велöдысь Марья Ивановнаöс пиыскöд, көть найö чужлісны да быдмисны Ручын, вöліны коми.

Сюрс öкмыссё нелямын витöд вося ода-кора öкмысöд лунö Ручö воис Победа йылысь юör. Бабöлөн казтылöм серти: котöртö председатель. Ставөн повзисны, мыйкö пö лои лектор. А председатель горзö: «Победа! Победа!» Чукöртчисны сиктса йöз митинг вылö. Коді бöрдö, коді сьылö, ставөн кутчысьлöны.

Таво моз дасöд лунö менам баблы тырас öкмысдас кык арöс. Сылөн куим ныв, сизим внук-внучка, дас öти правнук. Уна арлыд вылö видзöдтöг бабöй пыр на зіль да тэрыб, быдторйөн окотитö отсавны. И корöсьтö тэчас, и град вылысь ёг нетшкыштас, и правнукъясöс видзö-дöзьöритö. А кымын сьыланкыв да частушка тöдö!

Елизавета Иванова – тылса труженик. Сійöс пасйöма почётнöй грамотаясөн, «За доблестный труд в Великой Отечественной войне 1941-1945гг.» медальөн.

Меным зэв нимкодъ, мый миян рöдын эм татшöм нывбаба, код йылысь тöдчана коми гижысь Геннадий Юшков зэв стöча шуліс:

*Ичöтик да косіник,
Чукырöсь да дзор.
Шоныдінас, косінас
Уджавлін тэ кор...*

Ульнырова Елизавета Ивановна

Труженик тыла

Награждена:

почётными грамотами,
медалью «За доблестный труд
Великой Отечественной войне

1941-1945 гг.»,

медалями «50 лет Победы в Великой
Отечественной войне»

и «60 лет Победы в Великой
Отечественной войне».

Работала в Кустпроме

«1 мая», в Ручевском сельпо, в совхозе
«Ручевский» бухгалтером.



Медаль "За доблестный труд в Великой Отечественной войне 1941-1945 гг." Юбилейная медаль «50 лет Победы в Великой Отечественной войне 1941-1945 гг.»

Юбилейная медаль «60 лет Победы в Великой Отечественной войне 1941-1945 гг.»



Миян ыджыд рөдным

